
ТУРКИЙ ДАВЛАТЛАР ТУРИЗМ ВАЗИРЛАРИ ТУРКИЙ КЕНГАШНИНГ ИЛК ТУРИЗМ ПОЙТАХТИ – ҚЎҚОН БЎЙЛАБ САЁХАТ ҚИЛИШДИ

Бугун Қўқон шаҳрида бўлиб ўтган Туркий Кенгаш туризм масалалари вазирларининг VI йиғилиши иштирокчилари қизғин музокаралар якунига етгач, Жомеъ мажмуасида жойлашган миллий ҳунармандчилик маҳсулотлари кўргазмаси билан танишдилар.

Кейинги манзил эса шаҳардаги машҳур тарихий обида, Худоёрхон саройи бўлди. Бу ердаги тарихий экспонатлар барчада катта қизиқиш уйғотди. Ўрда ҳақидаги қизиқарли маълумотлар меҳмонларга ҳикоя қилиб берилди. Шунингдек, миллий урф - одатларимизни ўзида акс эттирган миллий либослар кўргазмаси ҳам ташкил этилди.

Мақом қўшиқлари, гўзал рақслар, бетакрор санъат намуналари ижроси йиғилганларда ўзгача таассурот қолдирди.

Туркий тилли давлатлар ҳамкорлик кенгаши аъзо мамлакатлари вакиллари Қўқон университетида ҳам бўлдилар. Олийгоҳ очик майдонида Қўқоннинг миллий ва замонавий ҳунармандчилигига оид кўргазмалар ҳамда 6 та ҳамкор давлатнинг маданияти ва урф-одатларининг ўзига хос намоиши меҳмонларни қувонтирди.

Ташриф давомида китоб мутолааси тарғиботига бағишланган, олтита давлатнинг буюк адиблари номлари акс этган "Тафаккур гулшани" монументига асос қўйилиб, нуфузли меҳмонлар иштирокида рамзий лента кесилди.

Ҳамкор давлатлар вакилларига эҳтиром рамзи сифатида университет ҳудудига туркий давлатлар байроқлари ўрнатилди ва меҳмонларга Қўқон тарихига бағишлаб ёзилган асарлар ва эсдалик совғалари тўхфа этилди.

Тадбир доирасида Қўқон университети талабалари учун Туркий тилли давлатларнинг манфаатли ва истиқболли ҳамкорлик алоқалари бўйича семинар-тренинглар бўлиб ўтди.

Туркий вазирлар учун шаҳар бўйлаб велосайрлар уюштирилди.

Иштирокчилар Ҳўқанди латифнинг азалий меҳмондўстлик анъаналарига яна бир бор гувоҳ бўлишди.

Бугун кечки соатларда меҳмонлар шарафига таниқли санъаткорлар иштирокида концерт дастури ўтказилиши ҳам режалаштирилган.